

Spaniamiutut aallarterlaanut B - 2022

1. Ilinniartitsissutip inissisimanagera

Spaniamiutoorneq piginnaasassanik ilinniartitsissutaavoq, ilisimasassanik ilinniartitsissutaavoq kulturikkut ilinniartitsissutaavoq, attaveqatigiinnikkut pisinnaasaqarnissamik tunngaveqartoq. Ilinniartitsissutip qitiusumik suliassaqarfigai spaniamiut oqaasii, ilaatigut Europami nunallu tamat akornanni nalinginnaasumik attaveqaatit ilaatigullu oqaatsit kulturillu allat paasinissaannut aqquusaagassatut. Ilinniartitsissutip suliassaqarfigai nunani spaniamiutut oqaluffiusuni oqaatsit, kulturi inuiaqatigiinnilu pissutsit – tamatigoortumik paasillugit.

2. Ilinniartitsissummi siunertat

Ilisimasat piginnaasallu

Ilinniartut spaniamiut oqaasiinik imatut ilisimasaqartigissapput oqaatsinillu imatut piginnaasaqartigissallutik spaniamiutut paasinnaallutik, oqalussinnaallutik attaveqarsinnaallutillu spaniamiut oqaasii ajornanngitsut ataqatigiissullu atorlugit. Ilinniartut inuiaqatigiinni spaniamiutut oqaaseqarfiusuni kulturinilu inuiaqatigiinni pissutsit kulturillu pillugit pingaaruteqartutigit ilisimasaqassallutik, .

Ilikkagaqartarnermi sulinermilu piginnaasat

Ilinniartut oqaatsinik ilikkariartornermik ukkassillutik aqqissuulluakkamillu suliaqarsinnaassapput aamma oqaatsit suliaqarsinnaassallutik atuarneq, tusarnaarneq, oqaatsinik pigiliussineq aamma oqaatsit oqaasilerinikkut ilusaanik itisilerineq aqquqatigalugit.

Inuttut inuillu akornanni attaveqatigiittarnermi piginnaasat

Ilinniartut namminneq ilikkartarnermik ilinniarnermilu piginnaasaqalerneq pillugit ilisimaarinnilluassapput. Ilinniartut ilinniartitsissummi ilinniartutullu nammineersinnaassapput aamma marlukkaarlutik suleqatigiikkaarlutillu sulisinnaassallutik.

Kulturikkut inuiaqatigiillu akornanni piginnaasat

Ilinniartut spaniamiut oqaasii eqqukannersumik atorsinnaassavaat, taamaalillutik kulturit akornanni attaveqarsinnaassallutik, ilaatigut taamaalillutik namminneq kulturikkut tunngavimminnik paasinnittarnermik ineriartortissallugu. Ilinniartut ilinniartitsissummi ilisimasatik Kalaallit Nunaanni pissutsinut sanilliussinnaassavaat aammalu nunarsuarmi qanilliarorfiusumi paasisassarsiornermi iliuuseqartarnermilu oqaatsit atorsinnaassallugit.

3. Ilikkagassatut anguniakkat imarisaalu

3.1 Ilikkagassatut anguniakkat

Ilinniartut ukuninnga piginnaasaqassapput:

- a) qulequttat tusagassiissutit assigiinngitsut aqquutigalugit saqqummiunneqartut ilisimariikkat ilisimanngisallu pillugit spaniamiutut erseqqissumik oqaluttoqarnerani imarisaasut pingaarnerit paasinnissinnaaneq,
- b) qulequttat ilisimariikkat ilisimanngisallu pillugit spaniamiutut oqaloqatigiinnermi peqataasinnaaneq,
- c) allatat suliareqqitaanngitsut, takorluukkersaarutit suliamullu atatillugu allat, tamatumunnga ilanngullugit tusagassiissutini allatat atuarsinnaallugillu paasisinnaanerit,
- d) qulequttat ilisimaneqareersut ilisimanngisallu pillugit oqaatsit ajornanngitsut atorlugit spaniamiutut allalluni oqariartuuteqarsinnaaneq,
- e) nunani spaniamiutut oqaaseqarfiusuni kulturi inuiaqatigiinnilu pissutsit pillugit qulequttat ilisimariikkat ilisimanngisallu paasillugillu nassuiarsinnaanerit,
- f) nunai spaniamiutut oqaaseqarfiusuni inuiaqatigiinni kulturikkullu pissutsit pillugit ilisimalikkat nammineq inuiaqatigiinnut kulturimullu ilaaffigisamat sannilliussinnaanerat aamma
- g) allamiut oqaasiinik ilinniartarnej pillugu ilisimasat ulluinnarni sulinermit atorsinnaanerit.

3.2 Ilinniartitsissutip imarisai pingaarnerit

Ilinniartitsissutip imarisai pingaarnerit tassaapput:

- a) oqaatsit atorsinnaasat tunngaviusut nalinginnaasullu oqalulluni attaveqarnermut atorsinnaasat,
- b) qulequttanut toqqakkanut naleqqiullugu aalajangersimasunik oqaatsinik atorsinnaasaqarneq,
- c) oqaatsit atornerinut sannaannullu tunngaviusumik tunngavigisat, taakkununnga ilanngullugit nalinginnaasumik morfologii, syntax, fonetik aamma pragmatik,
- d) allatat nutaaliat, Spaniamit Amerikamillu pisut,
- e) Spaniami Amerikamilu oqaluttuarisaanikkut kulturikkullu pissutsit, qulequttanut ilisimatusakkanut attuumassuteqartut,
- f) Spaniami Amerikamilu inuiaqatigiinni pissutsit qitiusut,
- g) Spaniami Amerikamilu maanna pisutsit. Atortussat spaniamiutut oqaasertallit ilaassapput, atortussanit naqitanit elektroniskiniilli kiisalu ilinniartitsissummi ikiorsissutinit qitiusunit pisut.
- h) Ilinniartitsissutip qitiusumik atortui

3.3 Illassutitut ilinniakkat

Ilinniartut taamaallaat pingaarnertut ilinniakkat atorlugit ilikkagassatigut anguniakkat angusinnaassanngilaat. Illassutitut ilinniakkat imarivaat spaniamiutut oqaluffiusunit atuakkiornikkut oqariartuutit assigiinngitsunik ilusillit inuiaqatigiinnut, kulturimut atuakkiornermullu tunngassuteqartut. Taakku ilinniakkap imarisai pingaarnerit itisilissavaat

sanilliussiffigalugillu kiisalu ilinniartitsissummut atatillugu ilisimasat annertusassallugit, tassuunakkut ilinniartut ilinniartitsissummi anguniakkanik angusaqarsinnaaqullugit.

4. Ilinniartitsinerup aaqqissuunneqarnera

4.1. Ilinniartitseriatsimi periutsit

- a) Ilinniartitsinerni ilinniartut ilinniakkani qaffasissusiat ilisimasaallu aallaavigineqassapput.
- b) Ilinniartitsineq imatut aaqqissuunneqassaaq ilinniartitsisut ilinniartullu akornani ilikkagaqartarnermi oqaloqatigiittarnerattut sapinngisamik isikkulerlugu.
- c) Ilinniartitsineq imatut aaqqissuunneqassaaq ilinniartitseriaatsit assigiinngitsut paarlakaajaanegassallutik.
- d) Ilinniartitsineq imatut aaqqissuunneqassaaq ilinniartut soqutigisaat pisariaqartitaallu isiginiarneqassallutik, taaamaalilluni ilinniartut ilinniartitsissutip pissanganartuuneranik, naleqquttuuneranik soqutiginarartuuneranillu misigisaqarnissamut periarfissinneqassallutik.
- e) Ilinniartitsineq imatut aaqqissuunneqassaaq ilinniagaqarnerup ingerlanneqarnerini ataasiakkaani sammisanilu ineriartortitsinermi ilinniartitsissut siuariarfiussalluni, tassa ilinniartitsissummi oqaatsit oqariartaatsillu ineriartorfiussallutik, taamaalilluni ilinniartut namminneerlutik suleriaaseqarnissamik ajornakusoortunillu eqqarsartarnissamut piffissap ingerlanerani sungiusarneqassallutik.
- f) Ilinniartitsineq imatut aaqqissuunneqassaaq inuiaqatigiinnut avatangiiserisanut annertunerpaamik attuumassuteqalersillugu.

4.2. Suleriaatsit

Suleriaatsinik toqqaanermi tunngaviussapput oqaatsitigut imarisaasutigullu ajornakusuussutsumut naleqqiullugu nikerartumik siumukarfiusumillu tunngavinnik, taamatullu ilinniartut assigiinngissusaat, ilikkariartoriaasii pisariaqartitaallu eqqarsaatigineqassallutik. Suleriaatsit suliassallu ilinniartut attaveqatigiinnikkut piginnaasaannik pilersitsisinnaassusaannillu inerisaasut qitiutinneqassapput.

Ilinniartitsineq ima aaqqissuunneqassaaq, atuisinnaanissaq annermik isiginiarneqassalluni, ilinniartitseriaatsillu assigiinngitsut atorneqassallutik. Ilinniartitsinerup ilinniartut periarfississavai oqaatsit - oqaluttariarsorluni allattariarsorlunilu attaveqatigiinnikkut piginnaasaqalernissamut pisariaqartut – pillugit ilisimasaqalernissamut, Tusarnaarnissamut, atuarnissamut oqaloqatigiinnissamullu periusissiat ilinniartut attaveqatigiinnermik aallartitsinissamut ataavartitsinissamullu sakkugissavaat.

Ilinniartut sungiusarneqassapput ordbogit oqaatsinik marlunnik ataatsimillu atuiffiusut aamma spaniamiutut oqaasilerissutit atornissaannut. Ilinniartitsineq sapinngisamik annertunerpaamik spaniamiutut ingerlanneqassaaq aamma ataqatigiissumiik oqaatsinik atuineq oqaatsitigut eqqoqqissaartuliornissamit salliutinneqassaaq.

4.3 IT

It tusagassiissutillu elektroniskiusut atorneqassapput pingaarnertut siunertaralugit ilinniartut ilikkariartornissaat ilinniarnermilu angusassaqaarnissaat. It-p ilinniartitsinnermi atorneratigut oqaatsit ataqatigiiffinni piviusuusuni atorneqassapput, tamatumalu periarfissippaa spaniamiut oqaasiisa nunarsuarmi tamarmi attaveqatigiinnermi oqaatsititut misigineqarnissaat, ataqatigiiffinni nikerartuni maannakkorpiarlu pisuni.

Atortussat digitaliusut ilinniartut oqaatsinik pigiliussiartornerat tapersissavaat, tamatumunnga ilanngullugu oqaatsinik pilersitsiartornerat. Ilinniartut ilinniartitsissummi atortussanik naapertuuttunik apersuusersuisumik pissuseqarlutik ujarlernissamut, toqqartuinissamut saqummiinissamullu pisinnaasaqassusiat inerisarneqassaaq, aamma ilinniartut tusagassiissutit digitaliusut attaveqatigiinnermut pingaarutaat ilisimalissavaat, tassuunakkut akisussaasumik, apersuusersuisumik pissuserissaartumillu nunarsuarmi tamarmi digitaliusumillu ataqatigiiffinnut peqataalersinnaaqqullugit.

4.4 Ilinniartitsissummi oqaatsit

Ilinniartitsineq imatut aqqissuunneqassaaq ilinniartut ilinniartitsissumi oqaatsinik aammalu ilinniartitsissummi oqariaatsinik paasinnittarnerat atuisarnerallu aqqissuussamik ineriartortinneqarluni. Ilinniartitsineq imatut aqqissuunneqassaaq ilinniartitsissutit siulianni oqaatsinik oqariaatsinillu ilinniartut piffissap ingerlanerani paasinnilluarsinnaatikkiartortillugit atuisinnaalluatiikkiartortillugillu.

4.5 Ilinniartitsissutitut allanut atassuteqartitsineq

Ilinniartitsineq imatut aqqissuunneqassaaq piffissat ilaanni ilinniartitsissutit akornanni suliaqartoqartarluni ilinniartitsissutinilu ilisimasaqarfiulersunut sanilliutitsilluni. Ilinniartitsissutinik allanik ataatsimik amerlanernilluunniit suleqateqarluni ilinniartitsissutit akimorlugit suliniut minnerpaamik ataaseq ingerlanneqassaaq.

5. Nalilersuineq

5.1 Ingerlaavartumik nalilersuisarneq

Ingerlaavartumik aamma sammisat ataasiakkaat suliniutilluunniit naammassereerneranni nalilersuisoqartassaaq, attaveqatigiinnermi pisinnaasassat tallimaasut iluanni: tusarnaarluni paasinninneq, atuarluni paasinninneq, oqaluttariarsorluni nassuiaaneq aamma allannermik pisinnaasaqarneq, tassuunakkut ilinniartunit ersarissumik paasineqaqqullugu ilinniartitsissummi killiffiup ineriartornerullu sumut killinnera, aamma ilinniartut ataasiakkaarlutik ataatsimoorlutillu angusarisatik pillugit eqqarsaatiginninnerat patajaallisarneqaqqullugu.

Ilinniartut ilinniartitsissummi killiffiat igerlatsinerup ingerlanerani misiliissutit assigiinngitsut atorlugit nalilerneqartassaaq: oqaluttariarsorluni allattariarsorlunilu misiliinerit, ilinniartup, klassip ilinniartitsisullu akornanni oqaloqatigiinnerit aamma ilinniartup ingerlatsineranik suliaanillu naliliinerit, tamatumunnga ilanngullugu ilinniartup imminut nalilinnera.

5.2 Mislitseriaatsit

Oqaluttariarsorluni ataatsimik misilitsittoqassaaq. Misilitsinneq marloqiusaavoq, piffissaq soraarummeerfissaq ataatsimut minutsit 30-t missaannik sivilissuseqarluni.

1) Spaniamiutut oqaasertat taalliaangitsut ilisimaneqangitsut allanngortitaanngitsullu qupperneq nalinginnaasoq ataaseq angullugu annertussusillit aallaavigalugit nassuiaaneq aamma allatanik paasinninneq. Allatat qulequttat ilisimatusarsimasat ilaannut attuumassuteqassapput. Qulequttat misilitsinnermut tunngavissanut ilaasut, ataatsimoorlutik ilinniartitsissummi ilikkagassatut anguniagassat aamma ilinniartitsissutip imarisai pingaernerit matussusissavaat. Qulequtaq ilisimatusarsimasaq spaniamiutut oqaloqatigiinnermut ilaatineqassaaq. Allatami taamaallaat oqaatsit immikkut ittut piviusumillu oqaaseqaatit nalunaajarneqassapput.

2) Assit ilisimaneqariinngitsut aallaavigalugit qulequttat nalinginnaasut pillugit spaniamiutut oqaloqatigiinneq.

1)-mut aamma 2)-mut piareersarnissamut katillugit minutsit 60-it missaannik piffissaliisoqassaaq. Piareersarnerup nalaani ilinniartup ikiorsiissutit tamaasa atorsinnaavai. Avammut attaveqarnissaq inerteqqutaavoq. Aammattaaq internetimik atuinissaq inerteqqutaavoq.

Holdimi ataatsimi misilitsissutissat annerpaamik pingasoriarlutik atorneqarsinnaapput.

Qupperneq nalinginnaasoq allaatigisanut tunngatillugu tassaavoq qupperneq naqinnernik akunneqsisakkanik 2400-nik imaqartoq, taallanut dramamullu tunngatillugu titarnerit 30-t, elektroniskimik tusagassiissutitigut atortunut tunngatillugu minutsit pingasut.

5.3 Naliliinermi tunngaviit

Misilitsinnermi soraarummeertup ilinniartitsissummi ilikkagassatut anguniakkanik, imm. 3.1-imi taagorneqarnerat naapertorlugu, qanoq annertutigisumik angusisimanagera nalilerneqassaaq. Soraarummeertut suliaqarnerminni ilikkagassatut siunertanik qanoq malinnitsiginersut nalilersuinnermi nalilerneqassaaq.

Pingaartinneqassaaq ilinniartup spaniamiut oqaasii atorlugit allatanik ilisimaneqariinngitsunik nassuiaanera aamma ilinniartup qulequtarisaminit spaniamiut kulturiannik, atuakkiaannik inuiqatigiinnillu ilaatitsinera. Aammattaaq pingaartinneqassaaq qulequttat nalinginnaasut pillugit oqaloqateqarsinnaassuseq aamma allatanik paasinninneq. Oqaatsinik ataqatigiissumik atuisinnaaneq immikkuualuttut ilanngullugit eqqoqqissaartuliornermit pingaerneruvoq.

Soraarummeertup suliaannik ataatsimoortumik naliliineq tunngavigalugu ataatsimik karakteriliisoqassaaq.